



**Ucapan Perasmian Yang Berhormat Senator Dato' Maznah Mazlan
Timbalan Menteri Sumber Manusia**

Merangkap

Pengerusi Majlis Negara bagi Keselamatan dan Kesihatan Pekerjaan

**PROGRAM KESEDARAN KESELAMATAN & KESIHATAN
PEKERJAAN DI SEKOLAH PERINGKAT NEGERI TERENGGANU 2012**

Tarikh : 8 Julai 2012 (Ahad)

Masa : 12.00 tengahari

Tempat : Sekolah Menengah Teknik Kuala Terengganu

Anjuran : Majlis Negara Keselamatan dan Kesihatan Pekerjaan (MNKKP)

Jabatan Keselamatan dan Kesihatan Pekerjaan Pahang (JKKP)

Kementerian Pelajaran Malaysia (KPM)

Jabatan Pelajaran Negeri Terengganu (JPN)

Pertubuhan Keselamatan Sosial (PERKESO)

Institut Keselamatan & Kesihatan Pekerjaan Negara (NIOSH)

Assalamualaikum w.b.t., Salam Sejahtera dan Salam 1 Malaysia,

1. Terlebih dahulu saya berasa sangat gembira dan bersyukur kepada Allah S.W.T kerana berpeluang bersama-sama menyertai majlis pada pagi ini sempena program **Kesedaran Keselamatan & Kesihatan Pekerjaan di Sekolah** peringkat Negeri Terengganu 2012.
2. Saya juga ingin mengucapkan ribuan terima kasih kepada pihak penganjur iaitu Majlis Negara bagi Keselamatan & Kesihatan Pekerjaan Malaysia (MNKKP), Jabatan Keselamatan & Kesihatan Pekerjaan (JKKP), Jabatan Pelajaran Negeri Terengganu (JPN), Pertubuhan Keselamatan Sosial (PERKESO) dan Institut Keselamatan & Kesihatan Pekerjaan Negara (NIOSH) kerana sudi menjemput saya bagi merasmikan program pada pagi ini.
3. Saya turut berasa bangga dengan kerjasama yang ditunjukkan oleh semua pihak yang terlibat khususnya Kementerian Sumber Manusia (KSM) dan agensi-agensi di bawahnya dengan Kementerian Pelajaran Malaysia (KPM) menerusi program seumpama ini. Komitmen serta keperihatinan terhadap aspek Keselamatan dan Kesihatan Pekerjaan warga Kementerian Pelajaran khususnya para guru dan pelajar sekolah ini amat dihargai.

Tuan-tuan dan puan-puan yang dihormati sekalian,

4. Pada 2 Julai yang lalu, Majlis Negara bagi Keselamatan dan Kesihatan Pekerjaan (NCOSH) telah membincangkan isu-isu berkaitan KKP di tempat kerja termasuklah di sekolah-sekolah. Untuk makluman, ahli NCOSH ini terdiri daripada wakil kerajaan, majikan dan pekerja serta badan sukarela yang disertai oleh Setiausaha Agung, Kesatuan Perkhidmatan Perguruan

Kebangsaan Malaysia. Antara isu yang dibangkitkan adalah keselamatan dan kesihatan para guru dan murid ketika menjalankan aktiviti ko-kurikulum, perjalanan ke sekolah serta kemalangan di dalam sekolah.

5. Program Kesedaran KKP di Sekolah ini bukanlah satu program yang baru di Negara ini, malah merupakan kesinambungan daripada Program Sekolah Selamat yang telah dilaksanakan mulai tahun 1991 oleh Kementerian Pelajaran Malaysia. Seharusnya semua pihak harus memainkan peranan bagi memastikan keselamatan dan kesihatan di tempat kerja terjamin. Sekolah merupakan sebuah tempat kerja yang terdiri daripada guru, kakitangan sekolah, pelajar dan pihak lain yang berurusan dengan pihak sekolah. Sudah pasti tempat kerja ini tertakluk kepada Akta Keselamatan dan Kesihatan Pekerjaan 1994 (AKKP 1994) yang dikuatkuasakan oleh Jabatan Keselamatan dan Kesihatan Pekerjaan (JKKP). Di dalam AKKP 1994, telah menyatakan tanggungjawab majikan dan pekerja yang mana pengurusan sekolah dan Jabatan Pendidikan diklasifikasikan sebagai majikan di sekolah. Pekerja ialah guru, pentadbir dan kakitangan sokongan, manakala pelajar dan pelawat diklasifikasikan selain daripada orang-orang yang bekerja.

Tuan-tuan dan Puan-puan yang saya hormati sekalian,

6. Sejak kebelakangan ini, kemalangan di sekolah sama ada yang berlaku kepada para pelajar sekolah, guru dan kakitangan sekolah kerap mendapat liputan sama ada di media cetak ataupun elektronik. Kemalangan yang berlaku, bukan sahaja telah mengakibatkan kecederaan kepada pelajar, bahkan ianya juga telah turut mengakibatkan kematian. Kes-kes begini bukan sahaja telah mencetuskan kebimbangan kepada pihak Kerajaan, bahkan juga para ibu bapa turut berasa bimbang akan keselamatan dan kesihatan anak-anak mereka semasa berada di sekolah.

7. Terdapat pelbagai kejadian kemalangan yang bukan sahaja mengakibatkan kecederaan bahkan juga menyebabkan kehilangan nyawa yang melibatkan guru dan pelajar ketika mereka mengikuti program dan aktiviti yang dianjurkan oleh pihak sekolah. Berdasarkan kepada laporan akhbar berkaitan kes kemalangan yang berlaku di sekolah, pada tahun ini sahaja terdapat empat kes kemalangan di sekolah seperti kebakaran koperasi sekolah, kantin terbakar dan siling runtuh. Di samping itu, pada tahun 2011, seorang pelajar maut ditimpa tiang bendera di Selangor, 7 pelajar cedera apabila laluan pejalan kaki runtuh di Sarawak serta kejadian kemalangan ketika menjalankan aktiviti ko-kurikulum.

8. Maka dengan itu, amatlah wajar supaya isu keselamatan dan kesihatan di tempat kerja diberikan penekanan oleh pihak pentadbir sekolah khususnya. Ini adalah kerana, sekolah juga merupakan suatu tempat kerja bagi seorang guru ataupun kakitangan sekolah. Mereka ini bertanggungjawab untuk memberikan ilmu pengetahuan kepada para murid di sekolah. Untuk itu, satu suasana pekerjaan yang selamat, sihat dan kondusif perlulah disediakan kepada para guru ini agar matlamat dalam menghasilkan para murid yang cemerlang dan terbilang akan tercapai.

9. Begitu juga dengan murid-murid yang berada di sekolah, keselamatan dan kesihatan mereka turut terletak di bawah tanggungjawab pentadbir sekolah. Persekitaran kawasan sekolah, peralatan yang digunakan dan aktiviti pembelajaran serta kokurikulum yang dijalankan sepanjang waktu persekolahan perlulah dipastikan agar tidak akan mengundang sebarang bahaya dan risiko kepada mereka yang boleh menjejaskan keselamatan dan kesihatan mereka.

Tuan-tuan dan Puan-puan yang saya hormati sekalian,

10. Ingin saya berkongsi maklumat kadar kemalangan di Malaysia, kadar kemalangan yang dilaporkan dari PERKESO pada tahun 2011 adalah sebanyak 59,897 berbanding tahun 2010 sebanyak 57,639 kemalangan kadar ini menunjukkan peningkatan sebanyak 3.92%. Walau bagaimanapun, jika dilihat secara holistik, kadar kemalangan Negara di tempat kerja pada tahun 2011 mencatatkan 3.4 per seribu pekerja jika dibandingkan lima tahun yang lalu 2007 ialah 4.52 per seribu pekerja. Hal ini dipandang serius oleh semua pihak. Di sini para semua pihak perlu memainkan peranan penting dalam sama-sama membantu kerajaan dalam mempromosikan 'Membudayakan ke arah keselamatan dan kesihatan pekerjaan'.
11. Kejadian kemalangan amat merugikan kerana sejumlah sejumlah wang terpaksa dikeluarkan bagi menanggung kos rawatan dan bayaran pampasan yang mana nilainya jauh lebih tinggi berbanding kos yang perlu dikeluarkan untuk mempraktikkan keselamatan dan kesihatan di tempat kerja. Oleh itu, setiap majikan dan pekerja di sekolah perlu memainkan peranan untuk bersama-sama menerapkan nilai-nilai amalan budaya kerja selamat dan sihat. NCOSH melalui JKKP telah menjalankan program Keselamatan dan Kesihatan pekerjaan di Sekolah (OSH in School) ditambah lagi dengan inisiatif NIOSH mengadakan buku panduan Program Keselamatan dan Kesihatan Pekerjaan di Sekolah sebagai rujukan dan maklumat mengenai KKP di sekolah.
12. Di samping itu, penaksiran risiko (*risk assessment*) ke atas sebarang aktiviti yang dijalankan di sekolah setiap hari amatlah penting agar sebarang kewujudan dan kemungkinan bahaya dan risiko dapat dikenalpasti dengan lebih awal. Ini adalah penting supaya langkah pembaikan dan pencegahan dapat dilakukan. Sebagai contoh, para guru

adalah berkemungkinan terdedah kepada bahaya ergonomik atau dalam kata lain sakit belakang dan tengkuk akibat berdiri terlalu lama semasa proses pembelajaran dan pengajaran yang lama. Pelajar juga boleh terdedah kepada bahaya semasa berada di dalam sekolah seperti terdedah kepada bahaya biologikal, contohnya terkena gigitan serangga beracun dan haiwan berbisa, serta turut terdedah kepada bahaya bahan kimia semasa berada di makmal yang boleh menyebabkan penghakisan, merengsa kulit dan letupan kimia. Selain itu juga para pelajar turut terdedah kepada bahaya sewaktu mengikuti pembelajaran praktikal di bengkel kemahiran.

Tuan-tuan dan puan-puan yang dihormati sekalian,

13. Dengan adanya sistem pengurusan KKP dan pelaksanaan program-program KKP di sekolah ini, adalah diharapkan matlamat dalam mengadakan persekitaran sekolah yang kondusif bagi proses pembelajaran dan pengajaran di sekolah akan dapat diwujudkan serta semangat Budaya Kerja Selamat dan Sihat dapat dipupuk di kalangan guru dan pelajar.
14. Sebagai contoh, aspek pengurusan dan pengendalian bahan-bahan kimia yang digunakan dalam aktiviti ujikaji atau eksperimen di dalam makmal di sekolah perlulah diberikan perhatian yang serius oleh pihak pentadbir sekolah. Pematuhan dan pengetahuan tentang keperluan seperti pengadaan *Material Safety Data Sheet* (MSDS), penggunaan peralatan pelindung diri yang sesuai seperti sarung tangan dan penutup mulut, penyediaan *Safe Operating Procedure* (SOP) serta keperluan latihan yang bersesuaian dilihat masih lagi boleh dipertingkatkan.

15. Sehubungan dengan itu, usaha yang dijalankan oleh Majlis Negara bagi Keselamatan dan Kesihatan Pekerjaan dalam merangka pelan dan strategi bagi melaksanakan Program Kesedaran KKP kepada sekolah-sekolah di peringkat negeri ini amat dialu-alukan. Program ini adalah bagi menerapkan kesedaran terhadap KKP dan mengamalkan budaya kerja selamat dan sihat semasa di sekolah dengan mengintegrasikannya dengan aktiviti-aktiviti yang dijalankan.

Tuan-tuan dan puan-puan yang dihormati sekalian,

16. Hasrat dan aspirasi negara menuju Negara Maju terarah kepada usaha melahirkan modal insan yang berilmu, berakhlak dan seimbang agar boleh menyumbang kepada keharmonian Negara yang mana ianya juga merupakan teras Falsafah Pendidikan Negara. Kesejahteraan negara akan dapat dicapai apabila atmosfera pembelajaran dipelihara agar sentiasa selesa, selamat dan harmoni di kalangan warga kerjanya.

17. Sebelum saya mengakhiri ucapan ini, saya sekali lagi ingin mengucapkan setinggi-tinggi penghargaan kepada Kementerian Sumber Manusia dan Kementerian Pelajaran Malaysia di atas kerjasama yang dijalin di dalam mendukung matlamat ke arah kemalangan sifar di sekolah. Dengan terlaksananya program KKP di sekolah ini, saya menaruh harapan agar Sekolah Menengah Teknik Kuala Terengganu ini akan menjadi "Sekolah Contoh Pengurusan Keselamatan dan Kesihatan yang Cemerlang" di negeri Terengganu.

18. Dengan kata-kata tersebut, saya dengan ini merasmikan **Program Kesedaran Keselamatan dan Kesihatan Pekerjaan di Sekolah Peringkat Negeri Terengganu 2012.**

Sekian, wabillahitaufik walhidayah wassalamualaikum warahmatullahi wabarakatuh.

Terima kasih.